

關

里

文

獻

考

闕里文獻考卷九十二

子孫著聞者第十五之二十

褒字文禮先聖二十代孫父宙有傳褒與張儉友善張儉之獄與弟融爭死詔書竟坐褒遂被法語在融傳中褒有墓碑埋沒已久雍正三年出城東廢地土中守廟百戶陳曰訓移植廟中同文門下文字磨滅不可讀粗辨姓氏而已

蘊字蘊光先聖三十六代孫居寧陵父賢有傳蘊通左氏春秋事親以孝聞遭母喪號痛欲絕旣葬將廬於墓所祖子歎謂曰汝生盡敬死盡哀庶幾孝者矣今汝幼吾又年老義未安也更思之蘊不得已廬中門外晝夜哀泣者三年有司欲旌之蘊謝曰身之事親歉於心者多矣敢竊名邪乃止年七十六卒

彥輔字德甫先聖四十五代孫父勛有傳彥輔年十八爲仙源縣主簿秩滿除將作監主簿以父疾求解職侍養衣不解帶者十五年服

闕知仙源縣官至國子監博士子二漢英宗穀漢英聰敏博覽善詩詞蚤卒宗穀官亦至國子博士

聖聰先聖四十六代孫居廣州祖繼明見文甫傳繼明次子惟聚生聖聰聖聰事曾祖承休以孝聞承休有痼疾聖聰聽醫言割股調藥承休疾尋愈而聖聰竟以股傷殞里人哀之爲立廟粵秀山之麓歲時祀之

敗字寧極譜失其名世系不可考宋史稱孔子四十六代孫隱居汝州龍興縣龍山之漋陽城性孤潔喜讀書有田數百畝賦稅常爲鄉里先遇歲饑分所餘賙不足者聞人之善若出於己動止必依禮法環所居百餘里人皆愛慕之見敗於路輒斂衽以避葬其父廬墓三年臥破棺中日食米一溢壁間生紫芝數十本州以行義聞賜粟帛又給復其家近臣列薦授祕書省校書郎致仕居數年召爲國子監直講辭不赴卽遷光祿寺丞頃之起知龍興縣復辭卒贈太常丞盜

嘗入敗家發其廩粟敗避之縱其所取嘗逢羸弱者爲盜掠其資敗追盜與語責之以義解金界之使歸所掠居山未嘗逢毒蛇虎豹或謂之曰子母夜行此亦可畏敗曰無心則無所畏晚年惟玩周易老子他書亦不復讀爲太元圖張壁上外列方州部家而規其中心空之無所書曰易所謂寂然不動者與此無異也

士份字元夫先聖五十三代孫父從星見明行人勛傳元季佃僕胡思明爲亂劫其母羅氏去士份奔赴賊所請以金帛贖不許願以身代又不許遂死焉

貞稔字懷德先聖六十三代孫五世祖公鎬見世職知縣貞叢傳高祖彥實曾祖承晉祖宏鶴父聞立貞稔有至性親終廬墓三年未嘗入城市鄉里稱爲孝子聞於朝爲旌其閭焉

衍劭字懋詣先聖六十五代孫九世祖希範見世職知縣承夏傳希範次子誠生公懋公懋生彥簡彥簡生承懋承懋生宏啓宏啓生聞

朋聞朋生貞英貞英生尙岱衍劭尙岱子也少好學以孝友稱讓美產於諸昆弟而獨取其瘠陋者里人以比薛包授宣化府通判歷池州府同知

衍樟字載遠亦先聖六十五代孫曾祖聞訥有傳祖貞璵以拔貢官至江西廣信府通判耽於琴奕吐屬有晉人風致父尙靖衍樟少孤貧力耕養母以孝聞鄉里閒性好學夜然薪照讀尤邃於易自謂學之三十年人無知者著大易中庸一貫圖及心性等論九篇晚舉於鄉家居教授以廉隅自厲母沒家不舉火者七日哀毀滅性五月而卒遺命妻子以衰經斂焉

衍球字伯玉亦先聖六十五代孫十七世祖端問見明五經博士彥繩傳端問第四子琬任臨川縣丞因家於臨川生拱衡拱衡生元諱元諱生之緒之緒生溫寵溫寵始遷新城之賢溪生思亮思亮生克性克性生希保希保生德明德明生公宗公宗生彥旻彥旻生承麟

承麟生宏璋宏璋生聞善聞善生貞休貞休生尙彝尙彝生衍球衍球天性孝友家初饒裕中漸落有異母弟三人衍球仰體父志悉以分產讓之自教授以給食且以養親諸弟旣壯皆不善謀生產分財都盡衍球復出穀以贍之者五六十一年友愛彌篤康熙二十一年授都昌縣訓導端已範士學者化之尋引疾致仕卒

衍佳字德餘亦先聖六十五代孫十七世祖端隱有傳端隱長子璩南宋時爲潤州丹徒縣丞因寓居金壇生杼杼生元明元明生之俊之俊生泮泮生思祖思祖遷陽山生克智克智生希舜希舜生謹謹生公敬公敬生彥述彥述生承鐸承鐸生宏試宏試生聞悌聞悌生貞卿貞卿生尙忠衍佳尙忠子也天性篤孝父患癰以口吮之親侍湯藥衣不解帶母嘗以事怒臥牀不食衍佳捧餐跪榻前俟食方起少苦貧力耕以養後稍豐裕值歲凶出粟以食餓者所全活不下千餘人邑令董某聞其賢躬造其廬盡賓主之禮而去後爲鄉飲賓

興永字起存先聖六十六代孫祖尙鉞有傳父衍璐隱居著述有廟庭禮樂典故等書興永爲諸生有孝行親喪廬墓哀感遠邇每學使者按部咸敬禮之

述曰孝弟爲立身大節古之君子原非以此邀名也况吾宗仰承聖澤沐浴於詩書之教者既深內行之修又奚足紀者雖然風會澆漓仁愛道息類而序之亦所以醜世厲俗也其不爲傳而以孝行著者尙有五十四代孫思權六十一代孫宏轉宏實六十二代孫聞諭六十四代孫尙鯨六十六代孫興浩六十七代孫毓珍毓穎列其名亦使不泯沒於後云

闕里文獻考卷九十二終

關里文獻考卷九十三

子孫著聞者第十五之二十一

祗字承祖先聖二十五代孫居會稽晉餘不亭侯愉之弟也會稽內史周札辟爲功曹史時札一門五侯並居列位吳士貴盛莫與爲比王敦深忌之及敦疾錢鳳以周氏宗強與沈充權勢相侔欲自託於充謀滅周氏使充得專威揚土乃說敦令充除之札遂遇害賓客故吏莫敢近者祗冒刃號哭親行殯禮送喪還義興時人義之

公怡字文友先聖五十八代孫也父諤有傳公怡性伉直遇事慷慨不避艱阻明天順三年舉於鄉成化八年歲大饑公怡念族衆貧之乃上書於巡撫牟倬情詞懇惻倬爲發粟二千石賑之舉族賴以全濟而公怡未嘗有德色卒年七十四

宏蘊先聖六十一代孫曾祖公珏有傳祖彥述山西澤州州判父承倚彥述第三子也宏蘊爲諸生以豪俠聞於鄉里人有以緩急告者

宏蘊無不應戚黨待以舉火者數十家

聞舉字知行先聖六十二代孫高祖公恪有傳曾祖彥武祖承翔父宏蘭聞舉初爲廬州訓導遷平原教諭諸生中有不足者聞舉捐俸濟之嘗有一富生以誣陷於理竟不能自直聞舉力爲白其冤而卻其所謝金人以是益高之

聞臯字知鶴亦先聖六十二代孫十二世祖攄見明五經博士彥繩傳攄第三子元遷爲潤州學正始遷句容生之芳之芳生瀧瀧爲明秀王與澤儀賓生思余思余生克福克福生希余希余生誠誠生公瑞公瑞生彥泗彥泗生承侶承侶生宏範聞臯宏範子也性豪邁慷慨好義當嘉靖隆萬閒歲更災祲又有三殿之役徵調徧海內句邑當解輓雖官爲給值而所賠者過半且非賂監收官吏輒毀之使更納邑人以此破產者相繼聞臯慨然思獨任以庇姻黨遂請於邑令許之所費不貲而保全者甚衆歲再大饑出穀千斛以賑鄉里有司

將旌之聞臯蹙額曰所濟不能一郡何侈焉有司賢之而止

貞璠字用璞先聖六十三代孫父聞訥見祖宏頡傳貞璠崇禎六年舉人以養親不仕博學多才崇尙氣節嘗慕朱家郭解之爲人當明季兵荒存至解紛禦侮一邑賴之

尙果先聖六十四代孫居江西新城七世祖德明見行球傳德明次子公倫生彥恭彥恭生承汀承汀生宏樸宏樸生聞炳聞炳生貞莊尙果貞莊子也爲人敦氣節重然諾聞族姪爲廣寇所劫不憚數百里攜金贖之里人頌其義焉

述曰史漢列傳皆敘游俠如朱田王劇陳原樓萬之徒大抵立氣節作威福散財結客以立彊於當世雖其事亦閒有足稱者而行多不軌於正義故後世史家弗道焉今敘家傳觀承祖以下或見害不避或緩急可依或排難解紛或輕財重誼類皆砥行立名功見言信有慷慨之風而無橫暴扞罔之事固非可與游俠者流一概而論也

關里文獻考卷九十三終

關里文獻考卷九十三終

關里文獻考卷九十四

子孫著聞者第十五之二十二

衍字舒元先聖二十二代孫祖父見晉餘不亭侯愉傳父毓晉征南軍司衍少好學年十二能通詩書弱冠公府辟本州舉異行直言皆不就避地江東時元帝爲安東將軍引爲參軍專掌記室書令殷積而衍每以稱職見知中興初與庾亮俱補中書郎明帝之在東宮領太子中庶子於時庶事草創衍經學深博又練識舊典朝儀軌制多取正焉由是元明二帝並親愛之王敦專權衍私於太子曰殿下宜博延朝彥搜揚才俊詢謀時政以廣聖聰敦聞而惡之乃啓出衍爲廣陵郡時人爲之寒心衍不形於色郡鄰接西賊衍教誘後進不以戎務廢業石勒常騎至山陽勅其黨以衍儒雅之士不得妄入郡境視職期月以太興三年卒於官年五十三衍於當時以博覽稱凡所撰述百餘萬言子啓廬陵太守又按晉書云衍宗人夷吾有美名博

學不及衍涉世聲譽過之元帝以爲主簿轉參軍稍遷侍中徙太子左衛率卒追贈太僕今譜失其名世系昭穆不可得而考云

稚珪南史作珪字德璋先聖二十九代孫譜云吳興太守琇之從兄弟也居於會稽父靈產於宋泰始中罷晉安太守有隱遁之懷於禹井山立館事道精篤吉日於靜屋四向朝拜涕淚滂沱東出過錢塘北郭輒於舟中遙拜杜子恭墓自此至都東向坐不敢背側元徽中爲中散太中大夫頗解星文好術數蕭道成輔政沈攸之起兵靈產密白道成曰攸之兵衆雖強以天時冥數而觀無能爲也道成驗其言擢遷光祿大夫以麓盛靈產上靈臺令其占候餉靈產白羽扇素隱几曰君有古人之風故遺君古人之服當世榮之祖道隆位侍中以上系不可考稚珪少學涉有美譽太守王僧虔見而重之引爲主簿州舉秀才解褐宋安成王車騎法曹行參軍轉尚書殿中郎蕭道成爲驃騎以稚珪有文翰取爲記室參軍與江淹對掌辭筆遷正員

郎中書郎尙書左丞父憂去官與兄仲智還居父山舍仲智妻李氏驕妒無禮稚珪白太守王敬則殺之服闋爲司徒從事中郎州治中別駕從事史本部中正齊武帝永明七年轉驍騎將軍復領左丞遷黃門郎左丞如故轉太子中庶子廷尉江左相承用晉世張杜律二十卷武帝留心法令數訊囚徒詔獄官詳正舊注先是七年尙書刪定郎王植撰定律章取晉律張斐杜預二家所注集爲一書凡一千五百三十二條爲二十卷表請付外詳校詔從之於是稚珪與公卿八座參議考正舊注有輕重處竟陵王子良下意多使從輕其中朝議不能斷者則制旨平決至九年稚珪上表曰臣聞匠萬物者以繩墨爲正馭大國者以法理爲本是以古之聖王臨朝思理遠防邪萌深杜姦漸莫不資法理以成化明刑賞以樹功者也伏惟陛下躡歷登皇乘圖踐帝天地更築日月再張五禮裂而復縫六樂頽而爰緝乃發德音下明詔降恤刑之文申愼罰之典勅臣與公卿八座共刪

注律謹奉聖旨諮審司徒臣子良稟受成規創立條緒使兼監臣宋躬兼平臣王植等鈔撰同異定其去取詳議八座裁正大司馬臣疑其中洪疑大議衆論相背者聖照元覽斷自天筆始就成立律文二十卷錄敍一卷凡二十一卷今以奏聞請付外施用宣下四海臣又聞老子仲尼曰古之聽獄者求所以生之今之聽獄者求所以殺之與其殺不辜寧失有罪是則斷獄之職自古所難矣今律文雖定必須用之用失其平不異無律律書精細文約例廣疑似相傾故誤相亂一乖其綱枉濫橫起法吏無解既多謬僻監司不習無以相斷則法書徒明於帙裏冤魂猶結於獄中今府州郡縣千有餘獄如令一獄歲枉一人則一年之中枉死千餘人冤毒之死上千和氣聖明所急不可不防致此之由又非但律吏之咎列邑之宰亦亂其經或以軍勦餘力或以勞吏暮齒猶情濁氣忍并生靈昏心狠態吞剝氓物虐理殘其命曲文被其罪冤積之興復緣斯發獄吏雖良不能爲用

使于公哭於邊城孝婦冤於遐外陛下雖欲宥之其已血濺九泉矣
尋古之名流多有法學故釋之定國聲光漢臺元常文惠績映魏閣
今之士子莫肯爲業縱有習者世議所輕良由空勲永歲不逢一朝
之賞積學當年終爲閭伍所嗤將恐此書永墜下走之手矣今若弘
其爵賞開其勸慕課業宦流班習胄子拔其精究使處內局簡其才
良以居外仕方岳咸選其能邑長並擢其術則臯陶之謀指掌可致
杜鄭之業鬱焉何遠然後奸邪無所逃其刑惡更不能藏其詐如身
手之相驅若弦括之相接矣臣以疎短謬司大理陛下發自聖衷憂
矜刑網御延奉訓遠照民瘼臣謹仰述天官伏奏雲陛所奏繆允者
宜寫律上國學置律助教依五經例國子生有欲讀者策試上過高
第卽便擢用使處法職以勸士流詔報從納事竟不施行轉御史中
丞遷驃騎長史輔國將軍建武初遷冠軍將軍平西長史南郡太守
稚珪以虜連歲南侵征役不息百姓死傷乃上表曰匈奴爲患自古

而然雖三代智勇兩漢權奇算略之要二途而已一則鐵馬風馳奮威沙漠二則輕車出使通驛虜庭推而言之優劣可睹今之議者咸以丈夫之氣恥居物下况我天威寧可先屈吳楚勁猛帶甲百萬截彼鯨鯢何往不碎請和示弱非國計也臣以爲戎狄獸性本非人倫鳴鳴狼踞不足喜怒蠡目蠆尾何關美惡唯宜勝之以深權制之以遠竿引之以大度處之以蠡賊豈足肆天下之忿捐蒼生之命發雷電之怒爭蟲鳥之氣百戰百勝不足稱雄橫尸千里無益上國而蟻聚蠶攢窮誅不盡馬足毛羣難與競逐漢高橫威海表窘迫長圍孝文國富刑清事屈陵辱宣帝撫納安靜朔馬不驚光武卑辭厚禮塞山無靄是兩京四主英濟中區輸寶貨以結和遣宗女以通好長轡遠御子孫是賴豈不欲戰惜民命也唯漢武藉五世之資承六合之富驕心奢志大事匈奴遂連兵積歲轉戰千里長驅瀚海飲馬籠城雖斬獲名王屠走凶羯而漢之棄甲十亡其九故衛霍出關千隊不

反貳師入漢百旅頓降李廣敗於前鋒李陵沒於後陣其餘奔北不可勝數遂使國儲空懸戶口減半好戰之功其利安在戰不及和相去何若自西朝不綱東晉遷鼎羣胡沸亂羌狄交橫荆棘攢於陵廟豺虎咆於宮闕山淵反覆黔首塗地逼迫崩騰開闢未有是時得失略不稍陳近至元嘉多年無事末路不量復挑強敵遂乃連城覆徙虜馬飲江青徐州之際草木爲人耳建元之初胡塵犯塞永明之始復結通和十餘年間邊候且息陛下張天造歷駕日登皇聲雷宇宙勢壓河岳而封豕殘魂未屠劒首長蛇餘喘偷窺外甸烽亭不靜五載於斯昔歲蟻壤癘食樊漢今茲蟲毒浸淫未已興師十萬日費千金五歲之費寧可貲計陛下何惜匹馬之驛百金之賂數行之詔誘此凶頑使河塞息肩關境全命蓄甲養民以觀彼弊我策若行則爲百世之福若不從命不過如戰失一隊耳或云遣使不受則爲辱命夫以天下爲量者不計細恥以四海爲任者寧顧小節一城之沒尙

不足惜一使不反曾何取慙且我以權取貴得我略行何嫌其恥所謂尺蠖之屈以求伸也臣不言遣使必得和自有可和之理猶如欲戰不必勝而有可勝之機耳今宜早發大軍廣張兵勢徵犀甲於岷峨命樓船於浦海使自青徂豫候騎星羅沿江入漢雲陣萬里據險要以奪其魂斷糧道以折其膽多設疑兵使精銷而計亂固列金湯使神茹而慮屈然後發衷詔馳輕驛辯辭重幣陳列吉凶北虜頑而好奇貪而好古畏我之威喜我之賂畏威喜賂願和必矣陛下用臣之啓行臣之計何憂玉門之下而無款塞之胡哉彼之言戰旣慙慙臣之言和亦慙闊伏願察兩塗之利害檢二事之多少聖照元省灼然可斷所表謬奏希下之朝省使同博議臣謬荷殊恩奉佐侯岳敢肆瞽直伏奏千里帝不納徵侍中不行畱本任稚珪風韻清疎好文詠飲酒七八斗與外兄張融情趣相得又與琅邪王思遠廬江何點點弟蔭並款交不樂世務居宅盛營山水憑几獨酌傍無雜事門庭

之內草萊不翦中有蛙鳴或問曰欲爲陳蕃乎稚珪笑曰我以此當
兩部鼓吹何必期效仲舉初汝南周顒爲前軍諮議時直侍殿省方
見賞遇於鍾山西立隱舍休沐則歸之稚珪因作北山移文以嘲之
曰鍾山之英草堂之靈馳煙驛路勒移山庭夫以耿介拔俗之標蕭
灑出塵之想度白雪以方絜干青雲而直上吾方知之矣若其亭亭
物表皎皎霞外芥千金而不盼屣萬乘其如脫聞鳳吹於洛浦值新
歌於延瀨固亦有焉豈期終始參差蒼黃翻覆淚翟子之悲慟朱公
之哭乍迴跡以心染或先貞而後黷何其謬哉嗚呼尙生不存仲氏
旣往山阿寂寥千載誰賞世有周子儁俗之士旣文旣博亦元亦史
然而學遁東魯習隱南郭偶吹草堂濫巾北岳誘我松桂欺我雲壑
雖假容於江皐乃縵情於好爵其始至也將欲排巢父拉許由傲百
氏蔑王侯風情張日霜氣橫秋或歎幽人長往或怨王孫不遊談空
空於釋部覈元元於道流務光何足比涓子不能儔及其鳴騶入谷

鶴書赴隴形馳魄散志變神動爾乃眉軒席次袂聳筵上焚芟製而
裂荷衣抗塵容而走俗狀風雲懷其帶憤石泉咽而下愴望林巒而
有失顧草木而如喪至其紐金章綰墨綬跨屬城之雄冠百里之首
張英風於海甸馳妙譽於浙右道帙常擯法筵久埋敲扑諠囂犯其
慮牒訴倥偬裝其懷琴歌旣斷酒賦無續常綢繆於結課每紛綸於
折獄籠張趙於往圖架卓魯於前錄希蹤三輔豪馳聲九州牧使我
高霞孤映明月獨舉青松落陰白雲誰侶礪戶摧絕無與歸石逕荒
涼徒延佇至於還廕入幕寫霧出楹蕙帳空兮夜鵲怨山人去兮曉
猿驚昔聞投簪逸海岸今見解蘭縛塵纓於是南岳獻嘲北隴騰笑
列壑爭譏攢峰竦誚慨游子之我欺悲無人以赴弔故其林慙無盡
澗愧不歇秋桂遺風春蘿罷月騁西山之逸議馳東臯之素謁今又
促裝下邑浪拽上京雖情投於魏闕或假步於山扃豈可使芳杜厚
顏薜荔無恥碧嶺再辱丹崖重滓塵游躅於蕙路汙淥池以沈耳宜

局岫幌掩雲關斂輕霧藏鳴湍截來轅於谷口杜妄轡於郊端於是
叢條瞋膽疊穎怒魄或飛柯以折輪乍低枝而掃跡請迴俗士駕爲
君謝逋客永元元年爲都官尙書遷太子詹事加散騎常侍三年稚
珪疾東昏屏除以牀輦走因此疾甚遂卒年五十五贈金紫光祿大
夫仲智家譜不載

紹安先聖三十三代孫居會稽陳散騎常侍奐之子也紹安與弟紹
新蚤知名陳亡客居鄢勵志於學外兄虞世南曰本朝淪覆吾分湮
滅有弟若此知不亡矣紹安與孫萬壽皆以文辭稱時謂孫孔隋大
業末爲監察御史唐高祖討賊河東紹安與夏侯端同監軍禮遇尤
密高祖受禪端先歸拜祕書監已而紹安閒道走長安高祖悅擢內
史舍人賜宅一區良馬二匹後與端同侍宴應詔賦石榴詩曰祇爲
來時晚開花不及春時人稱之尋召撰梁史未成而卒有文集五十
卷紹新陳書作紹薪紹安季弟紹忠亦有才學官至太子洗馬儀同

鄱陽王東曹掾紹子安楨構楨有傳生季翊構史作枹早卒贈蒲州刺史生若思若仲

季翊史作季詡字季和唐中宗嗣聖六年擢制科授祕書郎陳子昂常稱其神清韻遠可比衛玠終左補闕

若思少孤其母褚躬訓教長以博學聞有遺以褚遂良書者納一卷焉其人曰是書貴千金何取之廉答曰審爾此爲多矣更還其半擢明經歷庫部郎中嘗曰仕宦至郎中足矣座右置止水一石明自足意中宗初敬暉桓彥範當國以若思多識古今凡大政事必咨質後行三遷禮部侍郎出爲衛州刺史故事以宗室爲州別駕見刺史驚放不肯致恭若思劾奏別駕李道欽請訊狀有詔別駕見刺史致恭自若思始以清白擢銀青光祿大夫賜絹百匹累封梁郡公開元七年卒諡曰惠若仲歷遷給事三任與兄同府時人榮之若思子至至字惟微歷著作郎明氏族學與韋述蕭穎士柳沖齊名撰百家類

例以張說等爲近世新族剝去之說子均方有寵怒曰天下族姓何與若事而妄紛紛邪均弟素善至以實告初書成示韋述述謂可傳及聞均語懼欲更增損述曰止丈夫奮筆成一家書奈何因人動搖有死不可改遂罷時述及穎士冲皆撰類例而至書稱工

武仲字常父先聖四十七代孫居新淦宋司封郎中延之之子也幼力學仁宗至和八年舉進士中甲科調穀城主簿選教授齊州爲國子直講喪二親毀瘠特甚右肱爲之不舉哲宗元祐初歷祕書省正字校書集賢校理著作郎國子司業嘗論科舉之弊詆王氏學請復詩賦取士又欲罷大義而益以諸經策御試仍用三題進起居郎兼侍講邇英殿除起居舍人數月拜中書舍人直學士院初罷侍從轉對專責以論思武仲言苟不持之以法則言與不言將各從其意願輪二人次對時議祠北郊久不決武仲建言用純陰之月親祠如神州地祇擢給事中遷禮部侍郎以寶文閣待制知洪州又請從臣爲

州者杖以下公坐止劾官屬侯獄成聽大理約法庶幾刑不逮貴近又全朝廷體貌之意遂著爲令徙宣州坐元祐黨奪職居池州卒年五十七元符末追復之所著詩書論語金華講義內外制奏議雜文共百餘卷

平仲字義甫武仲弟英宗治平二年登進士第又應制科用呂公著薦爲祕書丞集賢校理兄文仲卒歸葬南康詔以平仲爲江東轉運判官護葬事提點江浙鑄錢京西刑獄紹聖中言者詆其元祐時附會當路譏毀先烈削校理知衡州提舉董必劾其不推行常平法陷失官米之直六十萬置獄潭州平仲疏言米貯倉五年半陳不堪食若非乘民闕食隨宜洩之將成棄物矣儻以爲非臣不敢逃罪乃徙韶州又坐前上書之故責惠州別駕安置英州徽宗立復朝散大夫召爲戶部金部郎中出提舉永興路刑獄帥鄜延環慶黨論再起罷主管兗州景靈宮卒平仲長史學工文詞著續世說釋稗詩戲野史

史證諸書傳於世

滋先聖四十七代孫居新淦曾祖糖見元邵武府經歷檜傳祖安世父仲容滋登宋哲宗元祐三年進士官至吉州司理參軍初文仲武仲平仲兄弟以文聲起江西世號清江三孔至是滋與從弟淑源並以能文成進士遂有小三孔之目其後文仲曾孫伯元伯迪及伯元子宗武亦以文名稱後三孔焉淑與滋同榜進士官至朝議大夫睦州通判源紹聖元年進士官至梧州團練淑父仲詢祖安邦安邦糖次子源父仲和祖安民安民糖第四子也伯元伯迪並寧宗嘉定三年進士祖浩然臨安府僉判父梓安豐主簿朱子門人伯元新豐主簿伯迪知新建縣事宗武寶祐元年進士官至瑞州通判

端甫字肅之先聖四十八代孫祖宗穀見宋國子博士彥輔傳父若初登進士端甫讀書樂道該洽古今金章宗明昌二年侍講党懷英薦其年德俱高召赴闕下特賜及第除將仕郎翰林學士以年老乞

歸卒

之載字德甫先聖五十二代孫父元敬有傳之載初仕福州路學正遷建寧路教授後改福州路知事不赴聚徒講學弟子數百人及卒門人爲立像祀於學子內有至性好讀書歷官江南行臺監察御史終都事論事剴切有直聲

思睿字達道先聖五十四代孫八世祖舜亮宋御史中丞道輔之子也舜亮生若升若升知新泰縣監修祖廟贈朝請大夫生端臣端臣生琇琇生接接生元讓元讓生之深之深生演元讓至演三世元時權主祀事思睿演子也雅好博古尤邃理學歷前衛教授泗水縣主簿卒年四十五

諤字貞伯先聖五十七代孫父希麟見曲阜縣知縣貞堪傳諤中明永樂六年鄉試第一會試下第時成祖在北京仁宗以太子監國謂近臣曰我朝孔氏子姓未有出仕者今得此人何不使成進士對曰

考試至公雖父子不容私也乃除教官謬時年二十五太子召見曰孔謬年少俊偉務令成進士命冠帶送國子監肄業未幾左春坊中允員缺太子顧謂東宮官曰此職非孔謬不可遂以中允教皇子諸王謬輔道講讀以嚴正稱賜第宅一區並器皿等物後轉大理寺評事改監察御史巡按江西遼東所至風紀肅然吾宗重喪禮棺槨務求堅美而佳木恆不易得謬按江西還見蜀賈售柏材者傾囊易之得百具載以歸用周宗長之貧不能具棺者官至河南按察僉事卒年六十九謬平生嗜性理之學於詩賦尤工所著有中庸補注三卷書進祕府又有舞雩春咏詩集二十卷子公恪

公恪字恭文通經傳性理之學好議論又喜談兵每及古今成敗事輒口講指畫具有條理聞邊陲有警卽奮臂起舞慨然有欲試之意嘗讀檀弓至孔門三出妻廢書歎曰斜徑敗良田讒口亂善言豈其異端之流攻擊矯誣而贅之者乎於是著三出妻辨以明其僞又著

有天爵絜矩等論明徹明智等辨思誠大始正本等說終隱不仕卒

年六十八

彥倅字朝德先聖五十九代孫六世祖濬五十二代贈魯郡侯第三子也仕元爲鉅野令生思友思友資稟魁岸不屑凡近以儒業薦爲太師府掾官至汝寧府推官初太宗世絕以宗法立嗣宜以小宗之嫡思晦襲爵而治與思誠再世以支庶越次紹封爲族人所不服思友乃敘述家譜方言於政府其後卒黜思誠而封思晦皆思友之力也其第四子克綱爲尼山書院山長生希匯希匯生誦誦生公載公載生彥倅彥倅以歲貢任臨海訓導陞高陽教諭博學好古教諸生具有成就卒祀臨海名宦祠

承侗字永冠先聖六十代孫祖公珏有傳父彥道公珏長子也博學工詩尤精顏魯公書法祖廟碑文多出其手承侗初任直隸保定知縣終荆藩長史居官清白三十餘載囊無餘資承侗篤信陽明之說

官跡所至卽開館會生徒講良知之學著易詩書四書代言中庸孔
庭續問三教指迷四事請教錄曰言夢解日月篇天理說天人直指
圖荊藩輔政錄等書時承侗從弟承仍子宏斐並受業教授餘
姚鄒組爲學亦講良知共相唱和從遊者甚衆承仍爲唐王府教授
宏斐隱居不仕承仍父彥述見其弟承倚子宏蘊傳

宏頡字以齊承侗兄承伙之子也天性淳謹厭絕佻巧以文章名世
初任商河縣訓導擢咸陽教諭再遷太平府教授子聞訥字知敏篤
志好學閉戶著書年六十足跡不入城市時人以方董江都云

聞詩字知言六十一代代襲衍聖公宏泰子也明弘治十六年以父
蔭授五經博士聞詩身長華無而持躬儉約絕去聲色耳目之好客
至設饌乾脯外無多品左右僕從鮮華服者平生止乘一馬非公事
出亦不御也性耽吟咏與人酬和往返至數十殊無鼓衰力竭之狀
世故號多才子云

貞時字仲甫先聖六十三代孫明大學士貞運之兄也居句容貞時少多病讀書不輟萬歷四十一年成進士授翰林院檢討知起居注屬神宗光宗相繼崩熹宗卽位一時詔誥表冊諡議之屬多出其手詳贍典要爲時所稱與弟貞運同在翰林時人比之軾轍郊祁以疾卒祀於鄉所著有在魯齋文集

尙珥先聖六十四代孫九世祖克伸有傳克伸第三子希緒以孝聞生誨誨生公蔡公蔡生彥壘彥壘生承鐸承鐸生宏擢宏擢生聞賀聞賀青州府學訓導生貞紘貞紘四氏學學錄尙珥其次子也性通敏尤精律呂之學晉豫吳楚諸省文廟禮樂皆聘請釐正焉晚卒於家

衍忒字懋法先聖六十五代孫祖貞璠有傳父尙愬衍忒嘗爲濟寧州訓導敦行孝友沉靜寡言舉孝廉方正辭舉鄉飲大賓又辭善書深入宋元名人之室著畫訣題畫詩等書行於世

述曰聖門四科終以文學豈不以立言一道與立德立功共屬不朽乎右自舒元以下披文相質博雅淹通蔚爲國華代傳英彥而貞伯與永冠弟兄尤能究心理學惜補注一書家無藏本永冠之書雖有存者而學宗姚江語多踳駁皆未敢列諸經術取附文苑固亦一時之秀也

關里文獻考卷九十四終

關里文獻考卷九十五

子孫著聞者第十五之二十三

立字子立先聖十四代孫父曜見曾祖安國傳立少游京師與劉歆友善嘗以清論譏貶史丹史丹諸子並用事爲是不仕以詩書教於關里生徒數百人子元

元字子元以郎校書嘗見稱於揚雄時劉歆大用事而元七年官不益或譏其不恤於進取元泊如也子建

建字子建與崔篆相善篆後仕王莽爲建新大尹數以世利勸建仕建曰吾有布衣之心子有衮冕之志各從所好不亦善乎且習與子幼同志故相友也今子以富貴爲榮而吾以貧賤爲樂志已乖矣乖而相友非中情也請與子辭遂歸鄉里漢光武中興天下未悉從化董憲部眾彭豐等暴於鄒魯之間郡守鮑永患之是時關里無故荆棘叢生一旦自關廣千數百步從舊講堂坦然至里門永大驚謂建

曰豈卿先君欲令太守行饗禮助太守誅惡邪建曰其然永曰爲之奈何建曰庠序之禮廢來久矣今誠修之民必觀焉且豐等爲盜或聚或散非有堅固部曲也若行饗射之禮內爲禽之之備外示以簡易豐等依衆觀化可因而縛也永從之用格殺豐等子仁以文學爲議郎博士官至南海太守

昱字元世先聖二十代孫漢太山都尉宙子也少習尙書家學大將軍梁冀辟不應太尉舉方正對策不合乃辭病去漢桓帝末遭黨事禁錮當是時主荒政謬國命委於閹寺士子羞與伍故匹夫抗憤處士橫議遂乃激揚名聲互相題拂品覈公卿裁量執政爭爲倖直之風而奸倖等亦遂搆成黨禍觸怒朝廷收執李膺等并株連陳寔之徒二百餘人或有不獲皆懸金購募使者四出相望賴尙書霍諝城門校尉竇武表解僅得赦歸田里禁錮終身於是正直放廢邪枉熾結海內希風之流共相標榜指天下名士爲之稱號上曰三君

言一世之所宗也次曰八俊言人之英也次曰八顧言能以德行引人者也次曰八及言其能導人追宗者也次曰八廚言能以財救人者也以擬古之八元八凱而昱之名列於八及焉靈帝卽位公車徵拜議郎補洛陽令以師喪棄官卒於家

羣字敬林先聖二十五代孫居會稽父爽有傳羣有智局志尙不羈蘇峻入石頭時匡術有寵於峻賓從甚盛羣與從兄愉同行於橫塘遇之愉止與語而羣初不視術術怒欲刃之愉下車抱術曰吾弟發狂卿爲我宥之乃獲免後峻平王導保存術嘗因眾坐令術勸羣酒以釋橫塘之憾羣對曰羣非孔子厄同匡人雖陽和布氣鷹化爲鳩至於識者猶憎其目導有愧色仕歷中丞性嗜酒導嘗戒之曰卿恆飲不見酒家覆瓿布日月久糜爛邪答曰公不見肉糟淹更堪久邪嘗與親友書云今年田得七百石秣米不足了麴糵事其沉湎如此卒於官有奏議二十二卷

述睿先聖三十八代孫祖舜見曾祖昌寓傳父齊參贊鼎令述睿少與兄克符克讓篤孝已孤偕隱嵩山而述睿好學不倦唐大歷中轉運使劉晏表薦述睿有顏閔之行游夏之學代宗以太常寺協律郎徵之轉國子博士歷遷尙書司勳員外郎史館修撰述睿每一遷卽至朝謝俄而辭疾歸以爲常德宗踐祚命河南尹趙惠伯齎詔書元纁束帛就嵩山以禮徵聘爲諫議大夫述睿旣至召對於別殿特賜第宅給以廐馬兼皇太子侍讀旬日累表固辭依前乞還舊山詔報之曰卿懷伊尹匡時之道有廣成嘉遯之風養素邱園屢辭命秩朕以峒山問道渭水求師亦何必務執勞謙固求退讓無違朕旨且啓乃心述睿旣懇辭不獲方就職改祕書少監兼右庶子再加史館修撰述睿精於地理重修地理志本末最詳性退讓與物無競每親朋集會嘗恂恂然似不能言者人皆敬之時令狐峒亦充修撰與述睿同職多以細碎之事侵述睿述睿卒不與較時人稱爲長者貞元四

年命齋詔并御僕衣服數百襲往平涼盟會處祭陷沒將士骸骨以
述睿精慤而誠故也九年以疾上表請罷官詔不許報之曰朕以卿
德重朝端行敦風俗不言之教所賴攸深未依來請想宜悉也述睿
再三陳乞乃以太子賓客賜紫金魚袋致仕仍賜帛五十疋衣一襲
故事致仕還鄉者皆不給公乘德宗優寵儒者特命給而遣之貞元
十六年九月卒年七十一贈工部尙書克符新唐書作克讓唐
書作述睿弟

述曰子立以清議沈淪子元以恬澹見抑子建以布衣終身三世相
承代厲貞素可謂脫世界於緇塵抗清標於物表者矣元世高自標
格卒罹黨錮敬林皎皎易污沈湎酒人述睿淡忽榮利嘉遯是耽雖
未軌於中道要與足崖壑而志城闕者迥異著之於篇亦所以風世
而厲俗也

關里文獻考卷九十六

子孫著聞者第十五之二十四

淳之字彥深先聖二十六代孫高祖衍有傳曾祖啓晉廬陵太守祖
愔宋尚書祠部郎父粲以祕書監徵不就淳之少有高尚志好墳籍
爲太原王恭所稱居會稽剡縣性好山水每有所遊必窮其幽峻或
旬日忘歸嘗遊山遇沙門釋法崇因畱共止遂停三載法崇歎曰緬
想人外三十年矣今乃傾蓋於茲不覺老之將至也及淳之還反不
告以姓除著作佐郎太尉參軍並不就居喪至孝廬於墓側服闕與
徵士戴顓王弘之及王敬弘等共爲人外之遊又申以婚姻敬弘以
女適淳之子尚遂以烏羊繫所乘車轅提壺爲禮至則盡歡共飲迄
暮而歸或怪其如此答曰固亦農夫田父之禮也會稽太守謝方明
苦要之不能致使謂曰苟不入吾郡何爲人吾郭淳之笑曰潛遊者
不識其水巢棲者非辨其林飛沉所至何問其主終不肯往茅室蓬

戶庭草蕪徑惟牀上有數卷書元嘉初復徵爲散騎侍郎乃逃於上虞縣界家人莫知所之弟默之爲廣州刺史出都與別司徒王弘要淳之集冶城卽日命駕東歸遂不顧與王弘之阮萬齡並爲謝靈運所欽重靈運與廬陵王義真牋曰會境旣豐山水是以江左嘉遜並多居之但季世慕榮幽棲者寡或復才爲時求弗獲從志至若王弘之拂衣歸耕踰歷三紀孔淳之隱約窮岫自始迄今阮萬齡辭事就閒纂成先業浙河之外棲遲山澤如斯而已旣遠同義唐亦激貪厲競殿下愛素好古常若布衣每憶昔聞虛想巖穴若遣一介有以相存真可謂千載盛美也元嘉七年卒年五十九

沉字德度亦先聖二十六代孫晉中丞羣之子也居會稽有美名何充薦沉於王導曰文思通敏宜登宰門辟丞相司徒掾琅邪王文學並不就從兄坦以裘遺之辭不受坦曰晏平仲儉祀其先人豚肩不掩豆猶狐裘數十年卿復何辭於是受而服之是時沉與魏顓虞球

虞存謝奉並爲四族之儔云

祐先聖二十八代孫居會稽曾祖愉祖汪皆有傳父侯晉江夏太守祐有至行隱於四明山嘗見山谷中有數百斛錢視之如瓦石不異採樵者競取入手卽成沙礫曾有鹿中箭來投祐祐爲之養創愈然後去宋明帝泰始中太守王僧虔辟主簿不就僧虔與張緒書曰孔祐敬康曾孫也行動幽祇德標松桂引爲主簿遂不可屈此古之遺德也子道徽

道徽字志業少厲高行能世其家風隱居南山終身不窺都邑齊高帝建元初豫章王嶷爲揚州辟西曹書佐不至鄉里宗慕之道徽族祖嗣之字敬伯宋孝武帝孝建初爲中書舍人非其所好自廬江郡守去官隱居鍾山朝廷以爲太中大夫卒道徽兄子摠有操行遇飢寒不可得衣食縣令吳興邱仲孚薦之除竟陵王侍郎竟不至嗣之摠譜並失其名系不可考

元演字流遠先聖五十一代孫居廣州五世祖聖聰有傳高祖若簡曾祖端士祖璋父揖元演博聞洽記日賦千言性清介不樂仕進講道於羊城北門建明德堂一時人士咸宗師之宋咸淳閒當道徵拜皆不就致廩粟又辭之所善曾南寶語之曰人生讀書求致用耳今世道衰微正學人經濟之秋何獨善爲元演笑而不答後隱居水村學者稱爲溪隱先生所著有明德集十卷

公輅字御文先聖五十八代孫曾祖克中有傳祖希恭配明魯靖王肇輝文登郡主授中奉大夫宗人府儀賓父覲南城兵馬司指揮公輅少奉父命習舉子業有聲庠序閒父沒乃歎曰蚤年讀書欲求一第以悅親耳今見背矣奚齷齪爲也遂棄去工詩歌究心理學寒暑不輟覓之士大夫結壽英會公輅以齒列第二亦不恆赴未幾復辭去卜居泗上因自號泗漁學者稱泗漁先生所著有南坡彙元和景象集泗漁樂府

貞灼字見性先聖六十三代孫曾祖承翔見聞舉傳祖宏芹承翔第三子也父聞顏貞灼明末隱居曹南遠近敬之盜賊肆起相戒不入其門

貞時字知考亦先聖六十三代孫居廣州十九世祖繼明見文甫傳繼明次子維翰維翰生志志生義義生魯臣魯臣生德望德望生堂堂元欽州別駕生祖舜祖舜生勝僧勝僧元末遷德慶州生普道普道生思恆思恆明英德縣知縣生克敦克敦生希倫希倫生伯修伯修次子公成舉人生彥文彥文生成康成康生宏檜宏檜生聞遠貞時聞遠長子也性恬澹不慕榮利康熙元年貢入太學例得選獨高尙不仕隱居教授生徒知州饒崇秩重其品常餽遺之不可致也一日從一僕歸自悅城道經山隘遇一老父驅黃牛一隊避路而去俄而有眾逐虎見貞時驚問見九虎否貞時曰未也以頃所見告眾咸嗟歎曰先生眞仁人君子故有此異也尋避亂遷居太平寨寨民多

梗頑不法常通欠官糧殺害州吏饒崇秩請兵勦之預使人戒貞時
徙避然後發兵寨人因得預知先遁賴以全活者甚衆焉

述曰易曰天地閉賢人隱又曰君子遠小人而嚴避之時義大
矣哉夫士生當世豈不欲各有所表見寧遂親魚鳥樂林草甘心自
絕而不悔哉蓋或垢俗以動其概或疵物以激其清或去危以圖其
安或回避以全其道雖曰所性固然亦各有所不得已也鴻飛冥冥
弋者何篡觀諸君子之風亦可識全身遠害之道矣

闕里文獻考卷九十六終

關里文獻考卷九十七

子孫著聞者第十五之二十五

熙先先聖二十七代孫居會稽祖祭見伯父淳之傳父默之好儒學

注穀梁春秋宋文帝元嘉閒爲廣州刺史以贓貨得罪下廷尉大將

軍彭城王義康保持之得免熙先博學有縱橫才文史星算無不兼

善爲員外散騎侍郎久不得調憤憤不得志義康之被黜出鎮江州

也熙先密懷報效且以爲天文圖讖文帝必以非道晏駕禍由骨肉

而江州應出天子以爲義康當之遂陰懷不軌欲要朝廷大臣爲亂

時左衛將軍太子詹事范曄意志不滿熙先欲引與同謀以素不爲

曄所重無因進說義康記室參軍謝綜曄甥也熙先嘗經相識乃傾

身事綜與之結厚因得見曄熙先家饒於財曄與博故爲拙行以物

輸之曄旣利其財寶又愛其文藝由是情好款洽熙先乃從容說曄

以弑帝立義康曄愕然熙先曰丈人雅譽過人讒夫側目久矣比肩

競逐庸可遂乎今建大勲奉賢哲圖難於易以安易危豈可棄置而不取哉曄猶疑未決熙先曰又有過於此者愚則未敢道耳曄曰何謂也熙先曰丈人奕葉清通而不得連姻帝室人犬豕相遇而丈人曾不恥之欲爲之死不亦惑乎曄門無內行故熙先以此激之曄默然不答反意乃定綜素爲義康所厚弟約又娶義康女旣爲熙先所獎說亦有酬報之意廣州人周靈甫有家兵部曲熙先以六十萬錢與之使於廣州合兵靈甫一去不反大將軍府史仲承祖義康舊所信念屢銜命下都亦潛結腹心規有異志聞熙先有誠密相結納丹陽尹徐湛之素爲義康所愛雖爲舅甥恩過子弟承祖因此結事湛之告以密計有法略道人先爲義康所供養又有王國寺法靜尼亦出入義康家內皆感激舊恩規相拯拔並與熙先往來熙先善治病兼能診脈法靜尼妹夫許耀領隊在臺宿衛殿省嘗有病因法靜尼就熙先乞治爲合湯一劑耀疾卽損自往酬謝因成周旋熙先以耀

膽幹可施結爲內應法靜尼南上熙先遣婢採藻隨之付以箋書陳說圖讖還義康餉熙先銅匕銅鑷袍段綦氈等物熙先慮事泄酖採藻殺之乃略相署置湛之爲撫軍將軍揚州刺史曄中軍將軍南徐州刺史熙先左衛將軍其餘皆有選擬凡素不善及不附義康者並入死目熙先又使弟休先爲檄文稱賊臣趙伯符肆兵犯蹕禍流儲宰湛之曄等投命奮戈斬伯符首今遣將軍臧質奉璽綬迎彭城王正位宸極又詐作義康與湛之書令除君側之患宣示同黨元嘉二十二年九月征北將軍衡陽王義季右將軍南平王鑠出鎮文帝於武帳岡祖道曄等期以是日爲亂許耀侍帝扣刀目曄曄不敢發十一月徐湛之恐事不濟密上章告變乃悉收付廷尉熙先望風吐款詞氣不撓帝奇其才遣人慰勞之曰以卿之才而滯於集書省乃我負卿也又詰責前吏部尙書何尙之曰使孔熙先年將三十作散騎郎那不作賊熙先在獄中上書曰囚小人猖狂識無遠概徒徇意氣

之小感不料逆順之大方與第二弟休先首爲奸謀干犯國憲齎膾
脯膾無補尤戾陛下大明含弘量包天海錄其一介之節猥垂優逮
之詔恩非望始沒有遺榮終古以來未有斯比夫盜馬絕纓之臣懷
璧投書之士其行至賤其過至微猶識不世之恩以盡軀命之報卒
能立功齊魏致勦秦楚囚雖身陷禍逆名節俱喪然少也慷慨竊慕
烈士之遺風但墜崖之木事絕升躋覆盎之水理乖收汲方當身膏
鈇鉞詒誡方來若使魂而有靈結草無遠然區區丹抱不負夙心貪
及視息少得申暢自惟性愛羣書心解數術智之所周力之所至莫
不窮攬究其幽微考論既往誠多審驗謹略陳所知條牒如故別狀
願且勿遺棄存之中書若囚死之後或可追存庶九泉之下少塞覺
責所陳並天文占候讖上有骨肉相殘之禍其言亦頗深切曄初被
收時謂入獄便死而帝窮治其事遂經二旬曄更有生望獄吏因戲
之曰外傳詹事或當長繫曄聞之驚喜熙先與綜笑之曰詹事當可

共疇事時無不攘袂瞋目及在西池射堂上躍馬顧盼自以爲一世之雄而今擾攘紛紜畏死乃爾設令今時賜以性命人臣圖主何顏可以生存十二月乃同弟休先及黨與皆伏誅

範字法言先聖三十一代孫居會稽五世祖國有傳高祖名失考曾祖景偉齊散騎常侍祖滔梁海鹽令六歷清要父岱範少好學博涉書史陳太建中爲宣惠江夏王伯義長史後主卽位爲都官尚書與江總等並爲狎客範容止都雅文章瞻麗又善五言詩尤見親愛後主性愚狠惡聞過失每有惡事範必曲爲文飾稱揚贊美時孔貴人絕愛幸範與結爲兄妹寵遇優渥言聽計從朝廷公卿咸畏範因驕矜以爲文武才能舉朝莫及從容白後主曰外閒諸將起自行伍匹夫敵耳深見遠慮豈其所知後主以問施文慶文慶畏範益以爲然自是將帥微有過失卽奪其兵分配文吏隋師將濟江羣官請爲備防文慶沮壞之後主未決範奏曰長江天塹古來限隔虜軍豈能飛

渡邊將欲作功勞妄言事急臣自限位卑虜若能來定作太尉公矣或妄言北軍馬死範曰此是我馬何因死去後主笑以爲然故不深備尋而隋將賀若弼陷南徐州執城主莊元始韓擒虎陷南豫州敗水軍都督高文泰與中領軍魯廣達頓於白塔寺後主多出金帛募人立功範素與武士不接莫有至者惟負販輕薄多從之高麗百濟崑崙諸夷並受督時任蠻奴請不戰而已渡江攻其大軍又司馬消難言於後主曰弼若登高舉烽與韓擒虎相應鼓聲交震人情必離請急遣兵北據蔣山南斷淮水質其妻子重其賞賜陛下以精兵萬人守城莫出不過十日食盡二將之頭可致闕下範冀欲立功志在於戰乃曰司馬消難狼子野心任蠻奴淮南僉士語並不可信事遂不行隋軍旣逼蠻奴又欲爲持久計範又奏請作一決當爲官勒石燕然後主從之明日範以其徒居中以當隋師未陣而北範脫身遁免陳亡與後主俱入長安初晉王廣戮陳五佞人範與散騎常侍王

瑳王儀御史中丞沈瓘過惡未彰故免及至長安事並露隋文帝以
其姦佞諂惑並暴其過惡名爲四罪人流之遠裔以謝吳越之人
述曰熙先範才學警敏又藻博瞻特以不軌於正遂致身敗名裂爲
世大戮良可歎也獨怪二人之行昭著史冊而家乘中頗多諱辭豈
親親之道宜爾邪然一朝失足百世莫改比而書之亦所以垂炯戒
於後世也

闕里文獻考卷九十七終

闕里文獻考卷九十八

子孫著聞者第十五之二十六

儒者讀書談道非徒自有餘而已也蓋將以修之身者致諸國使勲業爛於當時休聲垂於後世上不負君下不負學於是爲士之事終而其學亦不至以迂疎寡用見病於君子吾家沐浴聖澤陶泳遺經學古入官累世弗絕茲考既取其事蹟之可紀者敘傳如右帙其他策名吏籍事或無稽備列其名別爲一冊而以今之見登仕版者附焉其已散見他傳者不錄去複也官牘書所終從約也登曲阜一譜而不及流寓懼繁而多漏也嗟乎古來賢人傑士其湮沒而不彰者何可勝道誰謂銷沉泯滅中之必無可傳者邪

十四代喜諸曹校尉

十七代方字廣平豫章從事

十八代澍字君德魯從事恢字聖文守廟百石卒史

十九代旭字延壽魯相史訢字定伯魯戶曹術字子祐魯相史

二十代承字伯序魯都郵綱都郵功曹副掾浮魯都郵淮功曹史晨

字伯時河南尹謙字德讓郡諸曹史

二十一代暢魯五官掾恂字士信平東將軍衛尉

二十二代揚博亭侯

二十九代白鳥鄒丞

三十代曄中書侍郎

三十三代志約朝請大夫禮部郎中

三十四代琮洪州都督

三十五代立言祠部郎中慎言黃州刺史

三十八代惟昉兖州參軍惟時兖州都督功曹參軍

三十九代溫質四門博士

四十代拯字公濟侍中郁字宏周太子舍人絢字延休丹陽令綸字

司言戶部郎中續字引修曲阜令晦一作縵字文爲吏部侍郎

四十一代邈字準之諫議大夫遘滄州乾符令昌序散騎常侍

四十四代憲尙書工部員外郎河東轉運使

四十五代延渥隰州清化令延之殿中丞

四十六代宗簡太子中舍宗壽承議郎曹州節度判官宗哲迪功郎

孔庭族長兗州觀察推官

四十七代若拙字公智金州司理參軍若谷字公應朝散郎舒州戶

曹參軍惇字厚之朝散大夫忱字誠之儒林郎

四十八代端節字子奇中散大夫直祕閣京東轉運司管勾公事端

朝字子工國子博士潛將仕郎淵承直郎兗州司法參軍堦通直郎

仙源縣丞

四十九代瓌將仕郎曲阜主簿瑀字錫老登仕郎曲阜主簿琰字粹

老中順大夫忻州同知玖忠勇校尉曲阜尉瓚字純老朝請郎知和

州瑄字得老通城主簿瑣瑄並孔庭族長瑤迪功郎孔庭族長璵字
堅老行臺都事權管勾祀事瑭字德純將仕郎萊州招遠主簿
五十代撫字伯順廟學正摯字莘之從仕郎廟學教授擬字誠之登
仕郎持撫字安之並孔庭族長

五十一代元善字德新文林郎泰州教授元順字存之廟學正元量
字仁卿廟學教授管勾祀事元祚深澤主簿孔庭族長元祗孔庭族
長元裕字益卿將仕郎濟陽主簿孔庭族長元伸字信卿將仕郎須
城主簿元長元灝元質並提領監修林廟

五十二代之孚字顯甫濟南路教授之柔字毅甫從仕郎翰林國史
院編修之明字晦甫從仕郎兗州同知之祥字吉甫蒲臺主簿之敏
字勉甫池州青陽稅使之善孔庭族長之肅字寅甫大寧路學正之
嚴字雍甫泰安州判之威字溫甫費縣尹之容之進並提領監修林
廟

五十三代濟字世美承事郎曲阜尹涓字世盈建德路學正洙字世
魯新野尹滋字世榮將仕郎漢川主簿湜字世基順德路學正浩字
世德文林郎鉅野尹淋字世霖鄒縣教諭汾字世潛三氏子孫教授
安豐主簿濡鄆城教諭澈字世用冠州學正清字世廉章邱教諭漕
字世秀孔庭族長淳字世良將仕郎安慶路濰山主簿渙字世號將
仕郎新鄉主簿治字世泉州教授贛字世貞膠西主簿澈字世諒
永平路教授璋字世從兗州學正澄汴並提領監修林廟

五十四代思古字志道曹州景山書院山長思本字正道盤陽教諭
思恭字信道濟寧路同知思凱字垣道曲阜尹思善字性道太常寺
太祝思從字容道曹州教授思適字宏道河中府通判思禮字安道
御史臺管勾思範字禹道聖澤書院山長思莊字景道衛輝路文公
書院山長思用字行道威州學正提領監修林廟思則字允道武平
尹思舉字貢道福建延平路學正提領監修林廟思宣字友道容城

教諭思衍字元道盤陽路教授思復字裕道泉山書院山長思賁字
光道三氏學教授思櫟字壽道孔庭族長思義字與道思度字微道
並提領監修林廟

五十五代克忠字恕夫福建宣慰司照磨克常字永夫泗水教諭克
信字善夫尼山書院山長克義字達夫肥城主簿克禮字嚴夫寧海
學正克允字中夫元氏教諭克諒洽州路教授克溫字元夫高密主
簿克學字巽夫前衛教授克修字允夫陵縣主簿克剛字德夫晉陽
路教授克廣字毅夫無棣尹克邁字垣夫莘縣主簿克昌字耆夫曲
阜尹克莊字嚴夫永平路教授克煦字東夫三氏學錄兼孔庭族長
克勳字功夫克晟字炎夫並孔庭族長

五十六代希敏字士遜完州學正希英字士彥濟寧路教授希文字
士周曲阜知縣希祖字士嚴泗水尹希賢字士寧陵州學正希顏字
士學曲阜教諭希毅陝西米脂知縣希晟字士嚴希琛字士璽希迪

字士吉希瑾字士瓚希瑄希瑒並孔庭族長希韶字士美希璜字士聲並林廟舉事

五十七代諡字諫伯南直隸宿州訓導諱字慎伯北直隸河間知縣諱字文伯中奉大夫明鉅野王府儀賓諱字義伯詡字普伯諤字修伯諱字謹伯並孔庭族長

五十八代公禮字節文詹事府主簿公華字實文陝西苑馬寺丞公杰字佐文三氏學錄公統字一文曲阜知縣公翊字德文浙江山陰縣丞公錫字賜文曲阜知縣加兗州府通判公潤字澤文浙江桐鄉縣丞公澤字仁文曲阜知縣公寵公寧公綉公紆並孔庭族長公祿字錫文公性字理文公從並林廟舉事

五十九代彥麒字朝祥南直隸靈壁知縣彥章字朝顯尼山書院學錄彥珣字朝璽陝西莊浪衛教授彥士字朝臣曲阜知縣彥衡字朝亨三氏學錄彥組字朝綬南直隸吳江縣丞彥健字朝乾北直隸安

平訓導彥珩字朝韻河南羅山教諭彥敞字朝光南直隸鹽城主簿
彥隆字朝平明周王府教授彥雲河南閩鄉訓導彥禮字朝節北直
隸阜城縣丞彥厚字朝坤浙江建德訓導彥灝字朝肅林廟舉事彥
津字朝問明德王府教授彥確字朝誠山西繁峙知縣彥碩字朝大
河南懷慶府通判彥訢字朝賢陝西臨洮府教授彥範明魯王府儀
賓彥乾彥鳳並孔庭族長

六十代承諭字永聽北直隸盧龍訓導承緒字永紹河南湯陰主簿
承光兵馬司指揮承寧字永康兵馬司指揮承甯字永瑞南直隸應
天府訓導承鎬字永周三氏學錄承震字永器曲阜知縣承需字永
孚宗人府儀賓承復字永靜湖廣安陸府經歷承學字永聚南直隸
沛縣主簿承厚字永載曲阜知縣承李字永友館陶教諭承冉字永
藝南直隸安東主簿承泗字永道曲阜知縣承深字永資河南懷慶
府教授承瑀字永佩北直隸平鄉知縣承朴字永厚山西石樓知縣

承業字永基曲阜知縣承垵字永渭北直隸大名府教授承渠宗人
府儀賓承作字永則三氏學錄承儻字永盛北直隸大寧衛教授承
先字永孝北直隸高陽知縣承周國子監學錄承鏞北直隸靜海教
諭承正明儀賓承謨字永承承質字永嘉承蛟並孔庭族長承苾承
流並林廟舉事承紀字永修陝西潼關衛教授

六十一代宏毅字以遠浙江桐廬教諭宏川字以東河南封邱知縣
宏廊字以仕曲阜知縣宏盛字以德南直隸如皋知縣宏景字以昭
南直隸崑山縣丞宏昇字以東南直隸和州教授宏申字以重南直
隸鳳陽府通判宏鼎字以新長清訓導宏森字以茂邱縣訓導宏禮
南直隸武進縣丞宏鐸字以魯江西廣信府同知宏綿字以延北直
隸交河主簿宏幹字以象明魯王府紀善宏毅字以士曲阜知縣宏
重字以廉河南宣武衛訓導宏墳字以成洙泗書院學錄宏盤字以
珍尼山書院學錄宏燭字以彰明魯王府儀賓宏謙字懷虛四氏學

錄宏賓字以賢河南榮澤教諭宏頤字以昂洙泗書院學錄兼林廟
舉事宏頤北直隸高陽知縣宏存字以操新城訓導孔庭族長宏蔡
字以鬱明衡王府教授宏衍字以學山西榆社知縣宏養字湛一四
氏學錄宏超林廟舉事宏瑄字以晉宏侃字以直宏依字以仁宏俸
字欽錫並孔庭族長

六十二代聞儒明鄒平王府儀賓聞翰明魯王府儀賓聞聘字知用
明鉅野王府儀賓聞仕北直隸延慶衛教授聞教字知覺湖廣承天
府經歷聞憲明魯王府儀賓聞敦字知誠河南衛輝府教授聞古字
懷璞遼東衛教授聞評字知衡四氏學錄聞訂字洞源明魯王
府儀賓聞諒字建元新城教諭聞然字知雍四氏學錄聞檀字知本
浙江嘉興府通判聞譙字廷獻山西沁源知縣聞謹字知愿臨邑教
諭聞諦字斗華河南涉縣知縣聞德字知本山西壽陽知縣聞秀字
知山西萬全教諭聞賡字際可濟南府訓導聞武字靜還濟南府

教授聞僖字士嚴東昌府訓導聞上字知遇四川劍州州判聞範字
知矩鄒平訓導聞宥字知寬武定學正聞誨陝西伏羌教諭聞課字
知化海豐訓導聞謨字知訓在平教諭聞誥字知諫廣東始興知縣
聞俊字秀若北直隸天津道按察副使聞寬字滄涵沂州學正聞學聞叔字
字觀我陝西河西道按察副使聞寬字滄涵沂州學正聞學聞叔字
方升聞塾並孔庭族長聞叔兼聖廟四品官

六十三代貞棟字用隆禹城教諭貞明字用昭陝西西和知縣貞旨
江南寧國府通判貞來字用復浙江湖州知府貞培字用六湖廣靖
州知州貞銘字用三直隸密雲知縣貞銳字建白陝西慶陽府同知
貞孟字樂天直隸任邱訓導貞教字用寬曲阜知縣貞芳河南浙川
知縣貞燭洙泗書院學錄貞俊字含真益都教諭貞綱四氏學錄貞
昆字啓光博平教諭貞鑑字用登卽墨訓導貞祚字用昌陝西漢陰
知縣貞志平度州訓導貞璵字用修江西廣信府通判貞珽字君佩

聖廟七品官貞夫河南汝寧府通判貞恆字視久河南孟津知縣貞
珪字孟琪成山衛教授貞詩貞珍字瑞石貞珩字玉若並孔庭族長
貞珩兼聖廟八品官貞枚字用卜貞操字嚴中貞璘貞壘字璧新並
林廟舉事貞壘兼聖廟九品官

六十四代尙達字泰字五經博士尙文河南蘭陽教諭尙象字龍賓
觀城教諭尙義字宜之直隸南樂縣丞尙炳字含之淄川教諭尙經
字緯之浙江金華知府尙澄字玉澤洙泗書院學錄尙璠字聘之四
氏學錄尙基字建之直隸沙河知縣尙琨字輝之雲南白鹽井提舉
尙鎰字金鑑浙江龍泉知縣尙鈺字粹之江西寧州州同尙行字敬
修德州學正尙標字則之湖廣石門知縣尙皞字相玉江南滁州知
州尙達字章甫江西太和教諭尙賓字燕嘉陽信教諭尙愷字伯仁
曲阜知縣尙忻四氏學錄尙什字德俊洙泗書院學錄尙侃字直之
四氏學錄尙巖字俊德平原教諭尙一字自成鴻臚寺序班尙遜字

受之山西潞安府通判尙遵林廟舉事尙孝字順字齊東訓導尙懋
字齊浦平度州訓導尙溥萊陽教諭尙雋字秀之山西澤州府同知
尙欽字爾儀國子監博士尙鑑字秉秋江南金壇知縣尙釗字爾康
益都教諭尙寅字協恭聖廟九品官

六十五代行相字贊賢衍錫字啓賢衍隆字震寰並五經博士衍鎬
字懋乙尼山書院學錄兼林廟舉事衍鈺字泗寰太常寺博士衍楫
字柱明在平教諭衍茂字觀明山西平順知縣衍洪字懋彝江南武
進知縣衍圭字滄田直隸曲周知縣衍陞字超宗壽光教諭衍統字
懋一四氏學錄衍弼字懋衡淄川教諭衍珥字懋璧廣東潮州府通
判林廟舉事衍琦字荆璞河南盧氏知縣衍侯字懋勳四氏學錄衍
俊尼山書院學錄衍泗字文源四川布政使司庫大使衍楷字端成
在平訓導衍標字懋龍四川筠連知縣衍棧字慎先青城訓導衍澤
字沛也曲阜知縣衍芳字箕源聖廟五品官衍淖字浴有四氏學錄

行紀字連一尼山書院學錄衍檜字左文奉天錦縣知縣衍經字懋
倫昌邑訓導衍偉字智千廣西平樂知縣衍譜江南丹陽主簿衍誌
聖廟三品官衍楠字讓甫平原教諭衍濬字維商霑化教諭衍樾字
照寰衍澈字靜可衍楨字克生衍權字仲衡並林廟舉事衍壽字懋
林衍鉢字升萬並聖廟四品官衍淞字遠琦衍沛字漢址衍兆字兆
三並聖廟七品官衍成字韶九衍渭字華源衍莊字懋嚴並聖廟八
品官

六十六代興榮字起華尼山書院學錄興範字冕先直隸順德知府
興謙字塢先陝西鄜州州同興訓字發祥江西贛州知府興燦字起
先廣東英德知縣興斌字起振尼山書院學錄興義字起喻山西大
同府中路通判興滋字時萬湖廣衡州知府興濱字象商陝西寧羌
州同興濟字惠萬臨邑訓導興治字麟祥郟城教諭興潤字呈祥尼
山書院學錄興祥字夢兆廣東文昌知縣興言字起昌內閣中書舍

人興詔字起鳳雲南糧儲道興謨字起興福建邵武府通判興訪字
起延貴州甕安知縣興誥字遠猷江南廬州知府興認字起寬曲阜
知縣興謹字起信臨淄訓導聖廟四品官興論字起篤江南潁州州
同興鉢字式先德州訓導興鈺字起韶陝西潼商道按察副使興增
字如川聊城教諭興誘字起正卽墨訓導興璉字商珍兩廣都轉運
鹽運使興瑄字起誠湖廣衡陽知縣興侗字起原陵縣訓導興蚡湖
廣沔陽州同興譽字令聞江南淮安府高堰通判興警字安彰尼山
書院學錄興泰字佑辰順天遵化州判興振字不緒諸城教諭興祉
字帝錫直隸天津衛守備興立字卓如洙泗書院學錄興湯字起毫
淄川教諭興訥字起惠興濯字起清興煥字珠照並林廟舉事興構
字肯堂興揆字殿文並聖廟三品官興禾字起成興援字鳳文並聖
廟四品官興倫字天敘興抒字素文興承字續武並聖廟五品官興
棧興熾興揖字克讓興琛字獻廷興棧字鼎和興遠字輝路興周字

振西並聖廟七品官興岳字起泰興梅興技興翰興美興純興泰字
康阜興賓字允嘉興鄉字還息並聖廟八品官興煒字龍光興磐字
鳳儀興溱字濟溥興甘興擎字季重興宜興廕字秩餘興泗興竹字
筠青並聖廟九品官

六十七代毓珍字席玉直隸保定府通判毓璽字瑞玉尼山書院學
錄毓基字振茲湖廣枝江知縣毓墀字緒九尼山書院學錄毓坪字
靖九洙泗書院學錄毓培字仞九陝西涇縣知縣毓麟字瑞石毓瑛
字鍾璞並五經博士毓璋字鳴石直隸安州知州毓琮字鍾黃太常
寺博士毓琨字鍾玉江西廬陵知縣毓璞字鍾元都察院左都御史
毓珠字北沙江南江寧知縣毓璵字鍾甫四川重慶府同知毓珅字
連清洙泗書院學錄毓德字含輝四川昭化知縣毓忠字盡臣四川
巴縣知縣毓廉字介孚江西上猶知縣毓懿字鍾美臨淄訓導毓孜
河南登封知縣毓敏直隸晉州州判聖廟七品官毓珏字英垣四氏

學錄毓珵字仲玉萊陽訓導毓璘字叔玉順天昌平州判毓琚字季
玉曲阜知縣毓琇字瑩玉甘肅分巡甘山道按察副使毓瑾字次玉
湖南龍山知縣毓藩字鍾垣廣東惠州通判毓沘字德溢肥城千總
毓洙字鍾二江南溧水知縣毓沂字巨川陽信訓導毓鉢字佩錫尼
山書院學錄毓喬字負五萊州府教授毓炆字方昱濱州訓導毓述
字淑來洙泗書院學錄毓銓字子衡江蘇山陽知縣毓鈞字子廣四
川簡州州判毓鉉字子政兩浙鹽運副毓鈺卽壘訓導毓金字麗水
文登訓導毓昌字鍾文安徽旌德知縣毓梅字扶南聖廟七品官毓
炳字映九利津教諭毓儀毓琰字宜輝毓侗字文正毓銑字景中毓
碑字鍾砭並林廟舉事毓倬兼聖廟五品官毓琮字幼玉毓錫字睿
存並聖廟四品官毓瑱毓普字頤伯毓仝字純玉並聖廟五品官毓
全字鍾備毓銓字樹德毓鈿字學川毓鎮毓淳字敦樸毓豐毓楷字
端思毓本字立源毓桂毓時並聖廟八品官毓倬字鍾珙毓倬字鍾

正毓棟字大木毓鈞字秉和毓寬字子嚴毓堂字子芳並聖廟九品官

六十八代傳鉦字振遠聖廟三品官傳鏞字東序山西太原府同知傳本字振立洙泗書院學錄傳鈐字宏遠尼山書院學錄傳錕字重北洙泗書院學錄傳煥字瞻雲江蘇按察使傳煊字曜文湖廣零陵縣丞傳彭字振商江西南安府同知傳焯字振壑廣東海陽知縣傳煦字振曉太常寺博士傳炯字曜南江蘇揚州知府傳憲字由章太常寺博士傳桂字芳遠東平學正傳中字振一直隸冀州知州傳篤字振寬湖南東安知縣傳派字泗源順天府北路同知傳梅字天馥鄒平教諭傳松字鶴林曲阜知縣改聖廟六品官傳樞字歷九江蘇銅沛河防同知傳堂字振升貴州思南知府傳科字振修直隸寧津知縣傳照洙泗書院學錄傳家字子克傳壘字子文傳樞字運乾並林廟舉事傳壘兼聖廟七品官傳塤字伯叶傳栗傳楷字範遠並聖

廟四品官傳斌字振中傳照傳燿並聖廟五品官傳烜字象乾傳選
字振秀傳治字寧字傳剛字起華傳鍊傳禮並聖廟七品官傳杰字
振用傳相字帝勳傳濟字近仁傳銑字允輝並聖廟八品官傳照字
振和傳贊字勦成傳紳字紫佩傳鎮字振宇傳旺字盛遠傳模傳泗
字魯涵傳淮字泰流傳濤傳耿字介光傳銖字泉五傳載並聖廟九
品官

六十九代繼溥字體恒五經博士繼洞字體之直隸大順廣兵備道
繼汾字體儀戶部廣西司主事繼澍字體霖五經博士繼浩字體充
聖廟三品官繼泰字彙茹繼炳字文光並太常寺博士繼武字念修
尼山書院學錄繼威字體權刑部浙江司員外郎繼舜字體仁洙泗
書院學錄繼升四川成都府通判繼儒字體敬福建興化府經歷繼
忻字景炎青城教諭繼風字鵬搏臨淄教諭繼端字體方聖廟七品
官繼汧字體源繼述繼成繼宣並聖廟五品官繼瀚字沛源繼業字

文燦繼詩並聖廟八品官繼炆字體明繼詩字庭訓繼統字振源繼
焯字炘魯繼先字象先並聖廟九品官

七十年代廣棣字京度直隸獻縣知縣廣梓字用周浙江泰順知縣廣
堯字竣明聖廟四品官廣梅聖廟八品官廣攷字裕文江南提標左
營遊擊

關里文獻考卷九十八終